

**Inatsisartut aalajangiiffigisassaattut siunnersuut, Naalakkersuisut peqquneqassasut kingusinnerpaamik UPA2017-imi allannguutissamik siunnersuuteqassasut, Kalaallit Nunaannut suliffissarsiortut killilersimaarnissaat pillugu Inatsisartut inatsisaanni § 6 imm. 3-mi, sulisitsisut atorfinitsitsinissamik qinnuteqarnerisa kingorna ullut 14-it qaangiunneratigut kommune piffissap iluani aalajangiisimangippat, ingerlaannartumik atorfinitsitsinnaanerup atorunnaarsinneqarnissaa pillugu.**  
*(Inatsisartunut ilaasortaq Per Rosing-Petersen, Partii Naleraq)*

**pillugu**

**Inuussutissarsiornermut Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Siverth K Heilmann, Atassut, siulittaasoq  
Inatsisartunut ilaasortaq Aqqaluaq B Egede, Inuit Ataqatigiit, siulittaasup tullia  
Inatsisartunut ilaasortaq Justus Hansen, Demokraatit  
Inatsisartunut ilaasortaq Suka K Frederiksen, Siumut  
Inatsisartunut ilaasortaq Iddimangiiu Bianco, Inuit Ataqatigiit

Ulloq 2. maj 2016-imi siullermeerinninnerup kingorna ataatsimiititaliap siunnersuut misissorpaa.

#### **Siunnersuutip imarisaa siunertaalu**

Siunnersuutip kingunerisaanik Kalaallit Nunaannut suliffissarsiortut killilersimaarnissaat pillugu Inatsisartut inatsisaanni nr. 27, 30. oktober 1992-imeersumi § 6, imm. 3 allanngorteqqullugu Naalakkersuisut peqquneqassapput, taamaalilluni atorfinitsitsinissamik qinnuteqarnerup kingorna ullut 14-it qaangiunneranni kommune allatut nalunaaruteqarsimangippat sulisinnaasunik avataaneersunik atorfinitsitsinissamik atuinissamilluunniit akuersissut ingerlaannartumik tunniunneqarsimasutut igineqarunnaassalluni. Allannguutissatut siunnersuut kingusinnerpaamik UPA2017-imi saqqummiunneqassaaq.

### **Siunnersuutip Inatsisartunit siullermeerneqarnera**

Siunnersuummik siullermeerinninnermi partiit oqaaseqaataat oqaatigineqartullu malillugit siunnersuut partiit ilaannit tapersersorneqartoq ilaannillu tapersersorneqanngitsoq Inuussutissarsiornermut Ataatsimiititaliamit oqaatigineqarsinnaavoq. Inatsisartut naalakkersuinikkut taama oqariartuuteqarnerat Inuussutissarsiornermut Ataatsimiititaliamit tusaatissatut tiguneqarpoq.

### **Ataatsimiititaliap siunnersuummik suliarinninnera**

Kalaallit Nunaannut suliffissarsiorlut killilersimaarnissaat pillugu Inatsisartut inatsisaatigut nr. 27, 30. oktober 1992-imeersuklut siunertarineqarpoq sulisinnaasut Kalaallit Nunaanniittut suliffissanut maaniittunut siulliusussaataitanerisa qulakkeerneqarnissaa (§1).

Inatsit kommunini suliffissarsiuussisarfinit aqunneqarpoq. Aammattaaq suliffeqarfiit sulisussanik avataaneersunik<sup>1</sup> atorfinitsitserusuttut atuerusuttulluunniit suliffissarsiuussisarfimmut akuersissummik qinnuteqassapput, tamatumani atorfik sulisussamik kalaallimik inummilluunniit Kalaallit Nunaannut immikkut ittumik attuumassuteqartumik piumasarineqartut naapertorlugit ilinniagalimmik inuttassarsissunneqarsinnaannginnera (§ 6, imm. 1) akuersissuteqarnissamut tunngavissaatinneqarluni. Qinnuteqaatip tunniunneranit ullut 14-it qaangiutsinnagit suliffeqarfik allamik nalunaarutisisimangippat akuersissut tunniunneqartutut isigineqassaaq (§ 6, imm. 3).

Inatsisartut inatsisaanni § 6, imm. 3 allanngortinneqassasoq siunnersuuteqartup kissaatigaa, taamaalilluni ullut 14-it qaangiunneranni allatut nalunaaruteqartoqarsimangippat sulisinnaasunik avataaneersunik atorfinitsitsinissamik atuinissamilluunniit akuersissut ingerlaannartumik tunniunneqarsimasutut igineqarunnaassalluni. Tassunga atatillugu siunnersuuteqartup innersuussutigaa taama sivikitsigisumik piffissaqartitsinikkut suliffissarsiuussisarfii qinnuteqaatit naammassillugit suliarinninnissaannut angumersisinnaanngitsut, taamaattumillu atorfik sulisussamit kalaallimit inuttalerneqarsinnaagaluartoq sulisussanik avataaneersunik (pisinnaatitaanani)

<sup>1</sup> § 2. Inatsit atuuppoq nunami umiarsuartigullu assartuinnermi ilaasartaatinilu makkuninnga atorfinitsitsisarnerni:

1) atorfinni suliamik ilinniagaqarsimangitsunik inuttalerneqarsinnaasuni,

2) atorfinni suliasamat naapertuuttumik sulisitsisumi ilinniagaqaaqqarluni, inuutissarsiuutinut tunngaviusumik ilinniagaqaaqqarluni imaluunniit Siamasissumik Tunngaviusumik Ilinniartitaanerimi ilinniagaqaaqqarluni atorfigineqarsinnaasuni,

3) atorfinni annerusumik, soorlu inunnik isumaginnittussatut aamma isumaginninnermi siunnersortissatut, ilinniagaqaaqqarluni atorfiniffigineqarsinnaasuni,

4) atorfinni imarsiornerup tungaatigut annertunerusumik ilinniagaqaaqqarluni atorfiniffigineqarsinnaasuni.

Imm. 2. Aammattaaq inatsit atorfinnut akissarsiorfiusunut imm. 1-imi taaneqartuni avataaniit aggersunit inuttaqartinneqartunut atuuppoq, suliffeqarfiup sulisua Kalaallit Nunaata avataani suliffeqarfimmi atorfeqarnerasoq apeqquataatinagu.

pissarsiniartoqartarluni.

Taamaalilluni siunnersuut aalajangiiffigisassatut siunnersuutinut (56/126) 2012-imi upernaakkut ataatsimiinnermi saqqummiunneqartunut assersuunneqarsinnaavoq, taakkunani akuersissuteqarluni itigartitsilluniluunniit nalunaaruteqarnissamut ullunik 14-inik piffissaliineq qaammammut ataatsimut aammalu ullunut 30-nut sivitsorniarneqarluni<sup>2</sup>. Inuussutissarsiortut kattuffiisa, naalakkersuisoqarfiit il.il. saniatigut kommuninik ilaatigut tusarniaarneq tunngavigalugu siunnersuutit taamani itigartinneqarput.

Assersuutigalugu kommuneqarfik Sermersuup<sup>3</sup>, oqaatigaa:

*"Kalaallit Nunaannut suliffissarsiortut killilersimaarnissaat pillugu Inatsisartut inatsisaat nr. 27, 30. oktober 1992-imeersumi § 6, imm. 3-mi akissuteqarnissamut killigititap ullunit 14-init qaammammut ataatsimut ullunulluunniit 30-nut sivitsorlugu allannguinnessaq kommunip tapersersinnaanngilaa.*

*Tamatumani ilaatigut kommunip suliamik ingerlatsinerata sivitsornissaa kiisalu siunnersuutigineqartutut pisariaqanngitsumik killissarititaasup sivitsorneqarneratigut nunaqavissut piginnaaneqartut pissarsiarineqarsinnaasut amerliunnaanginnerat tunngavigineqarpoq.*

*Akissuteqarnissamut killissarititap sivitsorneqarnera ataatsimut isigalugu pisortat namminersortullu sullinneqarnerannut ajorseriaataasussatut nalilerneqarpoq."*

Naliliineq Kalaallit Nunaanni Sulisitsisut Peqatigiiffiata (maanna Sulisitsisut) tusarniaanermut akissutaani aamma ersersinneqartoq<sup>4</sup>:

*"Ullumikkulli sulisunik atorfinitsitsiniarnermut atatillugu inuussutissarsiuteqarfiup siviisuumik ingerlassatsisoqarfimmik atugassaqartitaareersoq GA isumaqarpoq. Taamaattumik najugaqarfimmit sulisussanik annertunerusumik atorfinitsitsinermik piffissaliussap sivitsoqqinnerata nassataqassanera GA-p upperinngilaa, paarlattuanilli aningaasartuutit annertunerulersut, tunisassiorsinnaassuseq ajornerulersoq, aamma pisisussanik ajornerusumik sullissinerulerneq nassatarissallugit, pissutigalugu atorfiit inuttassarsiukkat sapinngisamik sunniuteqarnerpaasumik inuttalerneqarsinnaanngimmata.*

<sup>2</sup> Siunnersuutit 2012-imi ukiakkut ataatsimiinnermi aappasaaneerqarput. Taamaalillunilu Inuussutissarsiortermet Ataatsimiititaliaq ulloq 1. november 2012-imi isumaliutissiissuteqarpoq (UKA2012/56-126).

<sup>3</sup> UKA2012/56-126-mut isumaliutissiissummit issuagaq.

<sup>4</sup> UKA2012/56-126-mut isumaliutissiissummit issuagaq.

*Aallarniutigalugu sulisussanik pisariaqartitanik inuttassarsiuinermik ajornakusoortitsinerusunik malittarisassianik aalajangersaasoqartinnagu suliffeqarfimmi amerlanerusut suliffeqalersinnissaannut naleqqiullugu suup ajornartorsiutaanerata imaluunniit unammillerfissaanerata qulaajarnissaat pingaarnerusoq GA isumaqarpoq. GA naapertorlugu piffissaliussap sivitsornera tassaavoq allaffissornermut tunngavissarisassaannaq."*

Tamatumalu saniatigut suliffeqarnermi sulisussaqaarniarnermi pissutsit assigiinngitsunit sunnersimaneqartartut Inatsisartunit isumaqarfigineqarsorinarput, taamaattumillu siunnersuutit inuiaqatigiinnut suliffeqarnermilu politikimut atatillugit isiginiarneqartariaqartut. Pissutsillu taakku sulii atuuttut isigineqartariaqarput.

Taamaalilluni suliffeqarnermi imminut assortuuttoqarpoq, tassa suliffissaaleqisut amerlagaluartut assersuutigalugu sullissinermik aalisarnermillu suliffissuaqarnermi suliffeqarfiit pingaartumik piffissani ulapaarfiusuni sulisussanik piginnaaneqarluartunik nassaarniarneq ajornartorsiutigisarmassuk. Tassunga ilanngullugu sulisussanik nunatsinnut tikerartitsinerup takutippaa najukkani sulisinnaasut suliffissarsiortut sulisitsisut pisariaqartitaannut naammaginartumik annertussusilimmik naapertuutinnngitsut, tamatumalu immini takutippaa sulisartut ilarpassui ilinniarsimasuunngitsut. Tamatuma kingunerisaanik sulisussat avataaneersut sulii pisariaqartinneqarajupput, naak najukkami sulisussanik atuinermut sanilliullugu sulisussanik avataaneersunik pissarsiniartarneq suliffeqarfinnut akisunerugaluartoq<sup>5</sup>.

Tamatuma peqatigisaanik suliffissaaleqisut ilinniarsimannngitsut amerlasuut sulilernissamut aningaasaqarnikkut kajumissuseqannngitsut *Inatsisunik tunngavilimmik suliffeqarneq pillugu nassuiaat* 2014-mi allassimammat Inuussutissarsiornermut Ataatsimiititaliamit maluginiarneqarpoq, tassa akissarsiat ikinnerpaaffissaat pisortanillu ikiorsiissutit imminnut qanippallaaqimmat. Aammattaaq nalunaarusiami allassimavoq ilaatigut inooqataanikkut peqqissutsikkullu ajornartorsiutit pissutigalugit suliffissaaleqisut ilarparujussui suliffeqalernissamut piareersimannngitsut<sup>6</sup>.

Nunatsinni suliffissat sapinngisamik annertunerpaamik kalaallinik inuttalernerqartarnissaannik anguniagaqarneq Inuussutissarsiornermut Ataatsimiititaliamit soorunami taperserneqarpoq, pissutsilli siuliani taaneqartut ersersippaat suliffissaaleqisut imaaliallaannaq

<sup>5</sup> Tak. *Inatsisunik tunngavilimmik suliffeqarneq pillugu nassuiaat 2014*, Inuussutissarsiornermut, Suliffeqarnermut Niuernermullu naalakkersuisoqarfik.

<sup>6</sup> *Inatsisunik tunngavilimmik suliffeqarneq pillugu nassuiaat 2014* naapertorlugu (qupp. 5) suliffissaaleqisut pingajorarterutaat suliatiqut, inuttut peqqissutsikkullu ima unammilligassaqartigisutut nalilerneqarput suliassamik tiguisinnaanatik, taamaattumillu suliffeqarnermut uteqqinnginnerminni piginnaanngorsagaanikkut aamma/imaluunniit tarnikkut inooqatigiinnikkullu annertuumik suliniuteqarfigineqarnissartik pisariaqartillugu. Naatsorsueriaatsimi tassani suliffissaaleqisut qaammammi tassani suliffeqarsimannngitsut kisimik ilanngunneqarput.

ikilisinneqarsinnaanngitsut. Akerlianik ilaatigut isumaginninnikkut, ilinniartitaanikkut suliffeqarnikkullu qaninnerusoq ungasinnerusorlu isigalugu akuleriinnik iliuuseqarnikkut aatsaat suliffissaaleqisut suliffissaqartinniarneqarnerat siuarsarneqarsinnaavoq, tassuunakkut suliffissaaleqisut suliffeqalernissamut suliffimmillu attassinissamut ikiorserneqassallutik. Tamatumani suliffissaaleqisut aningaasaqarnikkut maanna naatsorsuiffigineqartarnerat allannguiffigineqartariaqarsorinarpoq, tamatumalu saniatigut atuarnepup aamma/imaluunniit sulinerup – ataatsimut isigalugu – naleqassusianik inuiaqatigiinni isiginnittaaseq allanngortinneqartariaqarluni.

Tassunga atatillugu Inuussutissarsiornermut Ataatsimiititaliamit maluginiarneqarpoq Kalaallit Nunaannut suliffissarsiortut killilersimaarnissaat pillugu Inatsisartut inatsisaata allannguuteqartinneqarnera pillugu Inatsisartut inatsisaat nr. 27, 9 december 2015-imeersoq malillugu sulisitsisut sulisussanik avataaneersunik atuinissamik kissaateqartut atorfirmik inuttassarsiukkamik suliffissanut nittartakkami allagarsiisarnissaat piumasqaataavoq.

Tassunga ilanngullugu inatsimmut piareersaatini<sup>7</sup> allassimavoq suliffissanut nittartakkap kommunini suliffissarsiuussisarfinni sakkussatut atorneqarnissaa siunertaasoq, taakku suliffissaaleqisut taakkulu piginnaasaasa tamakkiisumik ilisimasaqarfiginerisigut kalaallinik sulisussanik suliffissanut innersuussisarnerat pisariinnerulissalluni. Taamaalillutillu suliffissarsiortut suliffissanut nittartakkamik aamma atuisussaatitaassapput. Taamaattumillu sulisussanik avataaneersunik pisariaqartitsinerup annikillinissaanut suliffissanut nittartagaq peqataaqataassasoq naatsorsuutigineqarpoq.

Inatsisartut inatsisaata kingunerisaani ilaatigut Kalaallit Nunaannut suliffissarsiortut killilersimaarnissaat pillugu Inatsisartut inatsisaanni nr. 27, 30. oktober 1992-imeersumi § 6, imm. 3 allanngortinneqarpoq. Tassunga atatillugu Inuussutissarsiornermut Ataatsimiititaliamit maluginiarneqarpoq ullunik 14-inik piffissaliussap akerrilernissaanut tusarniaaffigineqartut tamarmik pissutissaqarsimanngitsut, taamaattumillu piffissaliussap suliffissarsiuussisarfinnit ajornartorsiutaasutut isigineqarsimagunanninnera inerniliutissallugu pissusissamisoortutut ataatsimiititaliamit isigineqarpoq. Taamaalillunilu akerrlianik isumaqartoqarsimagaluarpat tamanna pillugu kommunit kommunillu nuna tamakkerlugu kattuffiat (KANUKOKA) oqaaseqarsimassagaluartut ataatsimiititaliamit ilimagineqarpoq.

Tamatuma peqatigisaanik siunnersuummut nalinginnaasumik nassuiaatit Inuussutissarsiornermut Ataatsimiititaliamit innersuussutigineqassapput, tassani erseqqissumik allassimalluni:

*”Taamaattumik piffissap suliamik ingerlatsinermut atorneqartup sivilunerulerneranik*

<sup>7</sup> Tak. “Unga siunnersuut: Kalaallit Nunaannut suliffissarsiortut killilersimaarnissaat pillugu Inatsisartut inatsisaata allannguuteqartinneqarnera pillugu Inatsisartut inatsisaat nr. xx yy 2015” (UKA2015/147) pillugu saqqummiussisut aammalu pingajussaaneerinninnissamut akissuteqaat kiisalu nalinginnaasumik nassuiaatit.

*kinguneqartussaangilaq, tamanna suli ullunik 14-inik sivilissuseqassamat. Kommunilu suliffissanut quppersakkakut pitsaanerusumik periarfissaqarpoq kalaallinik sulisussanik sumiiffissiniarnissaminut, nalilerneqarporlu suliaq taanna piffissap ullunik 14-inik sivilissusillip iluani naammassineqarsinnaasoq.”*

Illuatungaatigulli akuersissutinik itigartitsissutinillu ukiumut qanoq amerlatigisunik kommunit nalunaarutiginnittarnerat maannakorpiaq ilisimasaqarfigineqarsorinanngimmat Inuussutissarsiornermut Ataatsimiititaliamit eqqarsarnartoqartinneqarpoq.

Taamaalilluni Namminersornerullutik Oqartussat nalunaarutaat nr. 20, 19. november 2007-imeersoq (§ 2, nr. 3) naapertorlugu sulisussanik avataaneersunik atorfinitsitsinissamat akuersissutit itigartitsissutinillu amerlassusiat kommunit Naalakkersuisunut nalunaarutigisassavaat. Kingulliullugilli taaneqartut § 37 naapertorlugu apeqqummut nr. 2015-301-imut akissummut atatillugu paasissutissiissutigaat:

*”Aalajangiinerit tamakku Namminersorlutik Oqartussanut nalunaaruteqaataaneq ajorput, taamaattumik nalusarparput peqqussut qanoq akulikitsigisumik atorneqartarnersoq.”*

Nangipporli:

*”Naalakkersuisut ilisimasaqarfigaat avataaniit sulisussarsiorinissamat qinnuteqaataasartut, kommuninit itigartinneqartartut, sulisitsisuniit maalaarutaasartut tunngavigalugit, Namminersorlutik Oqartussat maalaaruteqartarnermi qullersaammata. Oqaloqateqartarnerit misiligitissatullu misissuinerit ingerlaavartut naapertorlugit suliffissarsiuussisarfiit nuna tamakkerlugu ukiumut itigartitsissutigisartagaat minnerpaamik arfineq marluusutut nalilerneqarput.”*

Tassunga ilanngullugu itigartitsissutit arfineq marluunerat annertugisassaangitsoq Inuussutissarsiornermut Ataatsimiititaliap siunnersuuteqartoq isumaqatigaa, tassa kisitsit qinnuteqaatit amerlassusiannut soorunami sanilliunneqassamat, taakkuli ataatsimiititaliamut ilisimatitsissutigineqanngillat. Kisitsilli Kalaallit Nunaanni sulisinnaanermut najugaqarsinnaanermullu akuersissutit Udlændingestyrelsen innutaasunut nunanit isumaqatigiissutit avataaneersunut tunniussaasa amerlassusiannut (ilaqutariit ataatsimoorsinnaanerannut suliat ilanngullugit) assersuutit sanilliunneqarsinnaavoq<sup>8</sup>:

<sup>8</sup> Tak. § 37 naapertorlugu apeqquteqaammut nr. 2015-301-imut akissut. Kunngip peqqussutaa nr. 150, 1992-imeersoq naapertorlugu naalagaaffimmi innuttaasut skandinaviami nunaneersut (Island, Savalimmiut, Norge, Sverige, Finland aamma Danmark) sulisinnaanermut najugaqarsinnaanermullu akuersissuteqaqqaratik Kalaallit Nunaanni suliffissarsiorsinnaapput. Taamaattumillu innuttaasut skandinaviameersut takussutissiami ilaatinneqanngillat.

	2011	2012	2013	2014
Akuersissutit	169	147	131	184

Tassunga atatillugu itigartitsissutit amerlassusiat suliamik suliarinnittoqarsimanninneranut imaluunniit atorfiit sulisussanit avataaneersunit taamaallaat inuttalernerqarsinnaasimanerannut takussutissaanersoq siunnersuuteqartoq assigalugu Inuussutissarsiornermut Ataatsimiititaliamit apeqquserneqarmat nassuerutigineqassaaq.

Tassunga atatillugu sulisussanut avataaneersunut akuersissutinik itigartitsissutinillu kommuninit tunniunneqartut siunissami nalunaarutigineqartarnissaasa siuarneqarnissaannut Naalakkersuisut suliniutigimmassuk Inuussutissarsiornermut Ataatsimiititaliamit iluarisimaarneqarpoq. Taamaalilluni § 37 naapertorlugu apeqqummut nr. 2016-76-imut akissummi ima allassimasoqarpoq:

*”Kommunit pisariitsumik allaffissornerujussuarlu atornagu akuersissutit itigartitsissutillu nalunaarutigineqarsimasut toqqaannartumik Namminersorlutik Oqartussanut nalunaarutigineqartalernissaat ullumikkut ataqatigiissillugu aaqqissuussaanngitsoq pitsaanagerusumik periarfissarsiuullugu Naalakkersuisut ullumikkut sulissutigaat. Taamaattumik Namminersorlutik Oqartussat internetikkut suliffissarsiortarfiup, suli.gl-ip, atuutsinneqalerneranut atatillugu, digitalimik nalunaarsuut nalunaarutigisanik siunissami oqinnerusumik nalunaarsuisartussaq atulerpaat. Taamaattumik siunissami qinnuteqartut internetikkut suliffissarsiortarfik aqutigalugu katersorneqartassapput.”*

Piffissap ingerlanerani nalunaarutiginnittarneq ilisimasatigut tunngavissaqalersitsissaaq, tamannalu tunngavigalugu ullut 14-it nalliutsinnagit allatut nalunaaruteqartoqarsimanngippat sulisussanik avataaneersunik atuinissamut akuersissut tunniunneqarsimasutut isigineqarsinnaanera pillugu aalajangersagaq matumani pineqartoq kingusinnerusukkut nalilerneqarlunilu allanngortinneqarsinnaavoq.

Siuliani allassimasut tunngavigalugit siunnersuummut annertunerusumik oqaaseqaateqarnissaminut Inuussutissarsiornermut Ataatsimiititaliaq tunngavissaqarsorinnigilaq. Inuiaqatigiit aaqqissugaaneranni pissutsit aammalu ullunik 14-inik piffissaliussap sivitsorneqarnissaanik siunnersuut siuliani taaneqartoq pillugu tusarniaanermut akissutit itisilerlugit paasisaqarfigumaneqarpata UKA2012/56-126-mut isumaliutissiissut innersuussutigineqassaaq.

**Allannguutissatut siunnersuut:**

Ataatsimiititaliami amerlanerussuteqartut Inuit Ataqtigiit Siumullu ilaasortaatitaasa allannguutissatut siunnersuut matuma kinguliani allassimasoq saqqummiuppaat:

Inatsisartut aalajangiiffigisassaattut siunnersuut, Naalakkersuisut peqquneqassasut kingusinnerpaamik UKA2017-imi allannguutissamik siunnersuuteqassasut, Kalaallit Nunaannut suliffissarsiortut killilersimaarnissaat pillugu Inatsisartut inatsisaanni § 6 imm. 3-mi, sulisisit atorfinitsitsinissamik qinnuteqarnerisa kingorna ullut 14-it qaangiunneratigut kommune piffissap iluani aalajangiisimangippat, ingerlaannartumik atorfinitsitsinnaanerup atorunnaarsinneqarnissaa pillugu.

**Siunnersuutip aningaasaqarnikkut kingunerisassai**

Siunnersuutip aningaasaqarnikkut kingunerisassai siunnersuuteqartumik nalunaarneqarput. Atortussat pigineqartut tunngavigalugit allatut naliliinissamut ataatsimiititaliaq tunngavissaqarsorinngilaq.

**Ataatsimiititaliap inassuteqaatai**

Ataatsimiititaliami amerlanerussuteqartut Inuit Ataqtigiit Siumullu ilaasortaatitaasa allannguutissatut siunnersuut akuerineqassasoq inassutigaat.

Ataatsimiititaliami ikinnerussuteqartut Atassutip Demokraatillu ilaasortaatitaasa matuma kinguliani allassimasunik oqaaseqaateqarlutik aalajangiiffigisassatut siunnersuut aammalu amerlanerussuteqartut allannguutissatut siunnersuutaat itigartinneqassasut inassutigaat.

Atassutip Demokraatillu pingaartitaraat maani nunami inuussutissarsiormi atugassarititaasut pitsaanerpaamik inissisimanissaa. Suliffeqarfik ajunnginnerpaamik ingerlassappat avaqqunneqarsinnaanngilaq sulisinnaassuseq pisariaqartinneqartoq pissarsiarisinnaagaa siunertamut ingerlanissaminut aqutissiuussisinnaasumut.

Isumaqarpugut pingaaruteqarluinnartoq suliffeqarfik sulisussarsiormermini nunatta sulisinnaasuinik ujarlissasoq suliffissaaleqineq maannakkut appariartortoq takusarput anikillisaqaataaffiginiarlugu. Kisiannili suliffeqarfik pisariaqartitai puigussanngilagut.

Suliffeqarfinnut aporfiussanngilaq kommunini sulilersitsinissamut akuersissutit avataaniillu tikisitanut tunngasunik sulianik aalajangiisarneq kigaatsumik ingerlanneqarneri pissutigalugu. Tamanna pineqartillugu isumaqarpugut aaqquissuussineq, amigartumik naliliisarneq isumaqartoq suliffeqarfik akuersissummik pisinnaasoq pissusissamisoortoq.



29. maj

UPA2016/85

Pisortaqarfinniit kigaatsumik ingerlatseriaaseqarneq namminersorlutik suliffeqarfiutilinnut eqquinerlussanngilaq taakkuummatami nunatsinni suliffissanik inuussutissarsiornermillu siuarsaasut.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Siverth K Heilmann  
Siulittaasoq



Aqqaluaq B Egede



Justus Hansen



Suka K Frederiksen



Iddimangiu Bianco